

NACRT

Na osnovu člana 22. Statuta Brčko distrikta Bosne i Hercegovine - prečišćeni tekst („Službeni glasnik Brčko distrikta Bosne i Hercegovine“, broj 2/10), Skupština Brčko distrikta Bosne i Hercegovine, na ____ sjednici održanoj dana ____ . godine, usvaja

ZAKON

O IZMJENAMA I DOPUNAMA ZAKONA O PARNIČNOM POSTUPKU BRČKO DISTRIKTA BIH

Član 1.

U Zakonu o parničnom postupku Brčko distrikta BiH (Službeni glasnik Brčko distrikta BiH, br.: 28/18 i 6/21), u članu 50. iza stava (2) dodaju se novi stavovi (3) i (4) koji glase:

„(3) Stranka može podnijeti reviziju putem punomoćnika koji je advokat.

(4) Izuzetno od stava (3) ovog člana, stranka može sama podnijeti reviziju ako ima položen pravosudni ispit, odnosno za nju može reviziju podnijeti kao punomoćnik osoba koja je prema odredbama ovog ili kojeg drugog zakona ovlaštena zastupati je u tom svojstvu iako nije advokat, ako ima položen pravosudni ispit.“

Dosadašnji stav (3) ovog člana postaje stav (5).

Član 2.

U Zakonu o parničnom postupku Brčko distrikta BiH član 92. mijenja se i glasi:

„Član 92

(1) Dostavljanje organima Distrikta i pravnim licima obavlja se predajom pismena licu ovlaštenom za primanje pismena ili radniku koji se zatekne u uredu, odnosno poslovnoj prostoriji, na adresu navedenu u tužbi.

(2) Dostavljanje pravnom licu može se izvršiti i preko njegove poslovne jedinice, ako spor proizlazi iz pravnog odnosa te jedinice.

(3) Ako dostavljanje pravnom licu na adresu navedenu u tužbi ne uspije, dostavljanje će se obaviti na adresu sjedišta tog lica upisanog u sudski ili drugi registar, a ako dostava ne uspije ni na toj adresi, obaviti će se stavljanjem pismena na oglasnu tablu suda i smatrat će se da je dostava obavljena istekom 15 dana od dana stavljanja pismena na oglasnu tablu suda.

(4) Ako je adresa upisanog sjedišta pravnog lica iz stava (1) ovog člana adresa navedena u tužbi, dostava iz stava (1) ovog člana neće se ponoviti na tu adresu, već će se obaviti stavljanjem pismena na oglasnu ploču suda.

(5) Odredbe stavova (2) i (3) ovog člana primjenjuju se i na fizička lica koja obavljaju određenu registrovanu djelatnost kada se tim licima dostava obavlja u vezi sa tom djelatnošću.

(6) Kad pismeno treba dostaviti Ombudsmenu Bosne i Hercegovine (u daljnjem tekstu: Ombudsmen BiH), dostavljanje se obavlja predajom pismena njegovoj pisarnici, odnosno službi za primanje pismena. Danom dostave smatra se dan predaje pismena pisarnici, odnosno ovlaštenoj službi.

(7) Dostavljanje prema odredbama stavova (1) i (2) ovog člana obavlja se i kad su stranke, navedene u tom stavu, za svog opunomoćenika odredile lice koje je njihov radnik.“

Član 3.

U Zakonu o parničnom postupku Brčko distrikta BiH član 337. mijenja se i glasi:

„Član 337

(1) Apelacioni sud odlučuje o žalbi na sjednici vijeća ili na osnovu održane rasprave.

(2) Apelacioni sud će zakazati raspravu kada ocijeni da je radi pravilnog utvrđivanja činjeničnog stanja potrebno pred Apelacionim sudom utvrditi nove činjenice ili izvesti nove dokaze ili ponovo izvesti već izvedene dokaze, kao i kada ocijeni da je zbog povreda odredaba parničnog postupka u prvostepenom postupku potrebno održati raspravu pred Apelacionim sudom.

(3) Ako ocijeni da je Osnovni sud izveo pogrešan zaključak o postojanju činjenice na temelju pravilno izvedenih dokaza, a drugi razlozi ne opravdavaju ponovno izvođenje dokaza, Apelacioni sud, uz saglasnost stranaka, na raspravi ne mora ponovno saslušavati stranke, svjedoke i vještake, nego može izvršiti preslušavanje tonskog snimka, odnosno čitanje zapisnika sa ročišta sačinjenih u prvostepenom postupku.

(4) Ako tokom postupka pred Apelacionim sudom stranka, svjedok ili vještak umre, ili ponovno saslušanje stranke, svjedoka ili vještaka nije moguće ili je znatno otežano iz drugih razloga, Apelacioni sud će pročitati zapisnik Osnovnog suda s iskazom stranke, svjedoka ili vještaka, odnosno preslušati tonski snimak sa ročišta na kojem su ovi dokazi izvedeni.

(5) Ako Apelacioni sud ocijeni da bi prvostepenu odluku kojom se meritorno okončava postupak trebalo ponovno ukinuti nakon što je ona već jednom ukinuta povodom žalbe, dužan je zakazati raspravu, osim ako se radi o presudi na osnovu priznanja, presudi na osnovu odricanja i presudi zbog propuštanja, te u slučaju da prvostepeni sud u ponovnom suđenju nije izveo sve parnične radnje i raspravio sva sporna pitanja na koja ga je upozorio Apelacioni sud u svom ukidajućem rješenju.

(6) Apelacioni sud, u pravilu, održava sjednicu vijeća, odnosno raspravu, u roku od tri mjeseca nakon što od Osnovnog suda primi spise po žalbi.

(7) Apelacioni sud će donijeti odluku u roku od 30 dana od dana održavanja sjednice vijeća na kojoj je odlučeno po žalbi, odnosno, ako je održana rasprava u roku od 30 dana od dana zaključenja rasprave.“

Član 4.

U članu 343. stavu (1) iza tačke e) dodaje se nova tačka f) koja glasi:
„ f) Ukinuti prvostepenu presudu i odlučiti o zahtjevu stranke.“

U članu 343. iza stava (1) dodaje se novi stav (2) koji glasi:

„(2) Prvostepena presuda se povodom žalbe može ukinuti i predmet vratiti prvostepenom sudu na ponovno odlučivanje samo jednom, osim ako se radi o presudi na osnovu priznanja, presudi na osnovu odricanja i presudi zbog propuštanja, te u slučaju da prvostepeni sud u ponovnom suđenju nije izveo sve parnične radnje i raspravio sva sporna pitanja na koja ga je upozorio Apelacioni sud u svom ukidajućem rješenju.“

Član 5.

U članu 347. stavu (1) riječi: „radi održavanja nove glavne rasprave“ zamjenjuju se riječima: „na ponovno suđenje“.

U članu 347. stav (5) mijenja se i glasi:

„(5) Kad Apelacioni sud ukine presudu Osnovnog suda i vrati predmet istom sudu na ponovno suđenje, odredit će u izreci odluke fazu u koju se postupak vraća, a može narediti i da se nova glavna rasprava ili pripremno ročište održi pred drugim sudijom.“

Član 6.

Ovaj zakon stupa na snagu osmog dana od dana objavljivanja u Službenom glasniku Brčko distrikta Bosne i Hercegovine.

Broj:
Brčko, _____. godine

**PREDSJEDNIK
SKUPŠTINE BRČKO DISTRIKTA BIH**

Damir Bulčević